



鄭端簡公文集叙



肅皇帝朝鹽官澹泉鄭端簡公
以文章政事名一代蓋公弱
冠擢解兩浙其王制等篇業
爲海內經生誦讀迨後敷歷
中外豎建炳然

朝野倚以爲重居常田百家之
藪而漁獵之於書無所不窺
而尤貴有用彙次我

朝文獻爲吾學編卷凡六十有
九洋洋乎奧衍悉備不佞舞
象時已共學士大夫靡然龜

鏡視之矣公旣沒而其他著
作甚富曩曾以懼累畀火存
者未及什一迄歲庚子公冢
孫敬中氏始克蒐集而剖劂
之工旣以序屬不佞不佞無
能爲役自惟公嘗誌先大父

奉政公墓有世誼又參戎孔
嘉第于公爲門下婿屬在戚
黨不可辭遂僭焉古有云文
章者經世之大業不朽之盛
事雕鏤萬象旋斡元化夫豈
人力也哉大塊生人林林總
總其僭爵執圭分茅裂土鳴
鐘鼎食者何限惟以文章擅
名照耀來禩者則恒寥寥代
不一二人或累代不一二人
又或亘數百年而無一人焉
蓋扶輿精英之氣鍾於一人

以洩其渾龐沕穆之秘大造
有所寄以洩而又不欲其盡
洩之而不肯輕以畀人者也
先秦兩漢而下若賈董兩司
馬班固劉向歆楊雄機雲梁
昭明諸君子外未易屈指輓
近世章句之士矢口爲腐語
旣不足過目而其刻意欲肖
先生之言巧拾其一字一句
而標剝之詭澁贅牙不可以
句其於大雅之音何若是二
者之所爲皆過也公崛起鹽

官邁俗友古諸所撰述雄渾
莊重正大爾雅不爲末俗鈞
棘刺目之技而古色蒼然與
生氣相射又慷慨激切讀之
令人毛豎且公不習爲修詞
子當分宜柄政時大節挺然
終身無所附麗雅意慕范希
文以天下爲己任以故集內
頗少風雲月露之句若六經
語孟諸解旣足以羽翼聖真
寄荅奏議等作疊疊數千萬
言凡疆土民生國計夷防

賦禮樂兵刑枚枚井井先憂
石畫燦然若指諸掌即世所
稱修詞子又或弗逮卓然名
一家言然則公之文非輓近
世之文而先民所謂經世之
文也後世有繼司馬子長而
作者或收公於儒林或爲公
作列傳皆可考而知焉若以
公列藝文志則猶淺之乎待
公者矣又公家夙有四賢集
蓋鄭氏自公大父贈尚書東
谷公一世父贈尚書吾核公

葉立角之三集卷之二
二世暨公三世公嗣贈光祿
少卿元宇公四世皆以鄉賢
從祀先師學宮故云
萬曆庚子孟夏旣望

賜進士出身中憲大夫浙江等
處提刑按察司副使奉

勅整飭台州兵備分巡紹台道
全椒眷晚生彭慶祖頓首拜
撰

端簡鄭公文集總目

卷一

說經

易說

書說

詩說

春秋說

禮說

孝經說

大學說

論語說

孟子說

經傳說

卷二

歌行

大同行

黃山行

映山行

凱賚行

送平齋先生長生口還鄉

五言古詩

坦齋

題羅大叅卷

寄費生

五言排律

壽少保許太宰

中麓草堂

周玉山壽母

述懷

五言律詩

答胡九峰鴻臚二首

詠馬

大風

即事四首

和容菴阻雨二首

途中十二首

中秋憶陶雙泉

諸同年被謫五律

懷子鎮

懷友人三律

北山

半村

園居五首

黃司訓還莆

憶黃海野

金山寺

彭城

宿浦口玉靈觀憶石城

故人

答陸篔簹齋

即事

雪屏

七言律詩

居和陽和宋賢三老堂

和謝右溪僉憲致仕 二首

秋日海上 八首

留城子房廟

壽張竹村封君

壽劉初泉乃翁

七言絕句

放舟

和陽公寓

諸將 十二首附 金陵唱和集

卷三

書

與吉陽何都憲

答虞坡楊司馬

答南岷王都憲

答水東閔少司馬

與侯貞菴

答荆川唐銀臺

與荆川唐都憲

答方湖王都憲

答荆川唐都憲

與草亭彭都憲

答雷古和

答盧嘉興

與吳默泉

與梅林胡都憲

復胡梅林

與胡梅林

復聶雙江

復王端溪

與謝與槐

與半洲張督府

又與張半洲

報李古冲

答吳初泉

與少渠張太守

答克齋李都憲

復東郭鄒祭酒

答黃潭陳都憲

答虞坡楊司馬

答華陽章都憲

答兩華羅大叅

與梧臯喻都憲

答克齋李都憲

與同野李都憲

與永明張都憲

答柏泉胡中丞

與董北山

答濯溪間柱史

復董後峰

與石渚馬年兄

與孫季泉

與彭草亭

復汪春谷

與吳默泉

復蔡鶴田

復右洲劉大叅

復希齋陳都憲

答蔡太守 揚金

答橫泉雷憲副

答方湖王都憲

與樊侍御

與余漳南

答東溟范都憲

與永石張都憲

與同野李都憲

答湛泉王文選

與永石張都憲

答柏泉胡方伯

答胡子忠

復王太守 道行

答黃海野

與毅菴

與趙大洲

卷四

序

別同年虞東厓序

壯遊錄序

送董大尹應召赴京序

叙海塘事略

壽碧梧龔公序

鄭省齋調笑集序

壽封君思竹錢翁七十序

合陽王氏世行錄序

淘涇劉氏家乘序

恩光錄後序

贈太宰兩洲王公改大司馬參贊機務序

苞溪李氏宗譜序

雲巢省錄序

送姊丈錢汝冲序

送湖東廖先生令文昌序

送西川沈先生任兗府序

壽平湖孫母六十序

送環峰宋憲副序

送郡太守次山鄭公述職序

送夏侯月川先述職序

壽少尹謝三溪七十序

送劉唐巖太守擢憲序

賀提督漕運總兵鎮遠侯平溪顧公簡授

總兵京營戎政帳詞并序

送沈龍山詞并序

虹橋鄭氏譜略

卷五

傳

杜生傳

雪菴和尚傳

南溪先生傳

王鶴山小傳

華職方傳

湛泉王公傳

陸長君傳

張淑人傳

李宜人傳

吳節婦傳

哀烈胡氏傳

祭文

祭吳南溪先生

祭整菴羅太宰

祭仰巉胡主政

祭苑洛韓公

祭吳憲長

祭戴鄣南

祭屠東洲中丞

祭范贈君

祭于二尹

祭華海月贈君

祭華水西年兄

祭徐東園

祭陣亡采馬滿三揮使

祭項瓶山

祭同年張淑安母

祭年家徐母趙太恭人

祭胡柏泉母

祭王樂湖母

卷六

碑銘

正議大夫工部右侍郎兼都察院右副都
御史贈工部尚書石涇陸公神道碑銘
墓誌銘

四川按察司僉事封通議大夫兵部左侍
郎楊公配贈淑人田氏合葬墓誌銘

延安府同知彭君墓誌銘

福建延平府同知封中憲大夫湖廣衡州
府知府蔡公墓誌銘

梅塘盛封君墓誌銘

中順大夫四川按察司副使致仕孫君墓

誌銘

海陽縣丞吳君墓誌銘

山陽知縣沈君墓誌銘

孫工部墓誌銘

錢工部墓誌銘

朱翁墓誌銘

廣東惠州知府鄂陽沈君墓誌銘

南澗徐翁墓誌銘

孫生墓誌

吏部稽勲郎中卜君墓誌銘

誥贈淑人王母顏氏墓誌銘

誥封李淑人墓誌銘

誥封恭人項母張氏墓誌銘

誥贈恭人錢母滕氏墓誌銘

誥封張宜人墓誌銘

殷贈君周太孺人合葬墓誌銘

李母屠孺人墓誌銘

樊母王孺人墓誌銘

朱母劉碩人墓誌銘

朱母馮碩人墓誌銘

墓表

浙江布政司都事致仕華君墓表

外王父福建建寧知縣費公墓表

行狀

南京光祿寺卿項公行狀

卷七

記

嘉興府題名記

平湖縣重修廟學記

躋古堂記

峽飲岩樓記

近田草堂記

嘉魚李氏重建義學記

當湖里居記

常足窩記

祀六府記

書兵部題名記後

書慶成圖本後

書趙漸齋戶帖卷後

書西墅卷後

書異路同恩卷

書胡端敏公行狀後

卷八

志論

皇明土官志

書六關圖後

書直隸三關圖後

書西山三關圖後

書遼東鎮圖後

書薊州鎮圖後

雜著

漢黨人論

讀晦翁劾唐仲友劄子

讀陶集四八目

蛇戒

嘉靖名臣頌

新建伯王公

少師大學士楊公

少保兵部尚書端敏胡公

少傅大學士蔣公

少保大學士石公

少保兵部尚書康惠李公

太子太保刑部尚書林公

少師大學士楊公

少保吏部尚書喬公

吏部侍郎何公

太子太保兵部尚書彭公

太傅大學士文襄席公

太子太保禮部尚書文敏霍公

大同總兵太保梁公

遼東總兵都督馬公

平齋沈先生像贊

自贊

連珠三十首

晉齋箴有序

觀井圖銘

午山銘

斗斛銘

弟子說有序

卷九

疏議

大同疏

乞養病疏

再乞養病疏

又乞養病疏

薦大武官疏

明職掌疏

會題詳議賊犯王直等疏

會題處置南京叛軍疏

申明律例疏

辯明御史鄭存仁欺罔疏

認罪回話疏

議

擬上監國議

卷十

疏

淮揚類

添設揚州同知一員駐劄瓜洲疏

漕運議事疏

乞收武勇亟議招撫以消賊黨疏

修築城寨疏

瓜洲築城疏

請發銀兩築城疏

議變塘田奏築瓜洲城疏

倭賊燒燬糧船比例折兌疏

擒剿倭寇疏

剿滅江北倭寇疏

官軍奮勇殺敗大勢倭寇疏

生擒真倭斬獲首級疏

斬獲倭寇首級疏

斬獲倭寇首級生擒姦細疏

剿逐江北倭寇疏

剿滅淮北倭寇疏

斬獲江北倭寇疏

剿逐江北倭寇疏

卷十一

疏

淮揚類

預處來年江南沿海漕糧疏

定議江南江北兵糧疏

預處來年漕運疏

僭運糧儲疏

久任理刑疏

議處驛傳疏

挑濬河道疏

建三里溝閘疏

參軍官索詐白糧船疏

肆奏災傷折徵秋糧疏

異常水雹疏

剿逐倭寇查勘功罪疏

停建江閘疏

剿滅江北倭寇查勘功罪并乞預為防禦疏

附錄鹽法莫御史奏功疏

附錄兵部覆題請陞賞錄蔭疏

卷十二上

疏

淮揚類

陵寢工程銀兩疏

修理陵墳告成疏

佃種昭陽湖櫃外餘田疏

申明三湖禁例疏

薦舉兵備官員疏

公舉劾以勵庶官疏

舉武職以備擢用疏

薦舉境內人才疏

卷十二中

疏

兵部類

查催覈冊疏

議處重鎮將官疏

會議大同巡按樂尚約題兵餉疏

覆給事中徐浦條陳疏

覆御史王本固倭寇疏

選軍疏

大工軍役疏

取用錢糧疏

卷十二下

疏

刑部類

奉旨從重擬罪疏

議大同撫按官楊順路楷罪疏

看議知府宿應麟等疏

看擬科道官查勘楊順路楷疏

參巡撫趙忻等疏

定擬葉宗文余光裕等罪疏

端簡鄭公文集卷一

海鹽鄭曉著 子履淳輯

說經

易說

伏羲作八卦非取於河圖也孔子傳易曰古者庖
羲氏之王天下也仰則觀象於天俯則觀法於
地觀鳥獸之文與地之宜近取諸身遠取諸物
於是始作八卦以通神明之德以類萬物之情
又曰天生神物聖人則之天地變化聖人效之
天垂象見吉凶聖人象之河出圖洛出書聖人

則之不此之信而信漢儒之說可乎書曰天乃錫禹洪範九疇亦不言洛龜事

後世言伏羲止八卦文王重之爲六十四卦者非也若無六十四卦何以能筮筮必六十四卦乃有三百八十爻不然筮必一爻動而後可占二爻動則無卦可占矣若謂至文王方有六十四卦何以唐虞時即有龜筮協從之說三皇堯舜何以取象於渙於噬嗑等卦乎

程子傳易據王弼本弼出費直朱子易本義據呂伯恭古易則本之田何費直易長于卦筮無章句以爻象文言等參入諸卦以解經田何易傳自孔子經分上下以孔子所作爲十傳皆有章句蓋程朱傳義異本今程傳朱義並行乃以朱義從程傳學者不復知有古易矣

易疑初筮告蒙約少宰彬陽何公孟春述也卷首有尚書林公俊題詞林公清耿有文章名題詞云彖上下象上下繫上下文言說卦序卦雜卦十翼孔子也愚謂又云彖上下傳象上下傳繫辭上下傳蓋彖文王之辭卦下之辭曰彖爻周公之辭六爻之辭曰爻亦曰象爻詞下又有小

象孔子之辭彖與象皆謂繫辭謂繫於義畫之辭也何公目錄云彖象上下傳繫辭傳是已但云文言文傳說卦傳序卦傳雜卦傳似亦未安文言說卦序卦雜卦即傳也非傳文言文說序雜卦也豈王肅本已然公因之耶何公博學沉思忠謹有奇節爲政持大體在吏部求材尤急近世名卿也

易林十六卷世傳出焦延壽雖隋唐藝文志亦然今考漢書儒林傳藝文志及荀氏漢紀皆不言焦氏著易林惟東漢書云許曼著易林至今行於世又云崔篆著周易林六十四篇用決吉凶多占驗隋唐藝文志載易林新林數家又不言有許氏易林沙隨程氏云延壽傳易於孟喜行事見儒林傳中今按傳言延壽獨得隱士說托之孟氏不與田丁輩同乃在京房列傳中儒林傳京房未嘗言延壽行事也近世彭安成叙易林深惜焦氏學不行無傳亦以易林歸焦氏矣大抵志隋唐藝文者皆謂焦氏易林後人因之其來已久余按漢書漢記疑今之易林未必出于焦氏况貢爲房師今考明夷之咸林云新作

初陵蹈蹈難登三駒推車跌損傷頤乃成帝時
事節之解林云皇母多恩字養孝孫脫於襍襪
成就爲君似言定陶傳太后育哀帝事皆在貢
後不應貢預言之也今刻易林載東萊費直曰
六十四卦變占者王莽時建信天水焦延壽所
撰劉向當成帝時校書已有貢易說貢非莽時
人明矣况直雖後於貢與高相同時雖直亦非
莽時人也唐王俞叙易林云貢與孟喜同時又
云當在西漢元成間喜與梁丘賀同門豈元成
間人也易林前引漢書至以貢爲延壽名黃秘
書校易進覽亦云延壽名貢其謬妄可知矣
易以文王爲中古禮以神農爲中古

書說

今文尚書二十九篇出秦博士伏生所謂虞夏商周四代之書也尚書本不止此遭秦焚坑之禍藏於壁中多遺失耳伏生以此教於齊魯間爲大傳三篇漢文時求治尚書者無過伏生使太常掌故晁錯往受之至武帝時孔安國等專治古文尚書於是古文尚書反多於今文孔臧與安國書尚書二十八篇儒者以爲上應二十八宿不知又有古文尚書是武帝前本無所謂古文尚書故孟子引放勳乃殂落云堯典安國古

文分堯典慎徽以下爲舜典又分臯陶謨帝曰
來禹以下爲棄稷分盤庚爲三篇分顧命王若
曰以下爲康王之誥凡五篇中間多有改竄而
尚書遂非故經劉歆云古文一十六篇者類多
恠異之說凡經書所引率所不載當時老儒尊
經不肯置對不肯奏立學官歆移書甚勤竟亦
不聽安國古文相傳至東晉時又有二十五篇
之書乃改棄稷爲益稷齊蕭鸞四年姚方興以
慎徽五典不可徑分爲舜典又增曰若以下二
十八字甚至改易刪落益無忌憚此又東晉假
安國之書而爲之也蔡氏集註並存今文古文
吳氏纂言獨釋今文不可謂無見先儒嘗疑古
文易讀今文固難讀亦欲有所釐正然古文中
論學論政精密廣大之處甚多要非聖賢不能
作故寧存而不廢伏生書先出名今文安國書
後出名古文者以古文科斗書今文隸書故也
虞書一典二謨曰堯典曰大禹謨曰臯陶謨乃古
本也五篇非古本矣

漢儒說九族有二禮戴及尚書緯歐陽說九族乃
異姓有屬者父族四母族三妻族二古尚書說

九族從高祖至玄孫凡九族皆同姓

四岳即許由故曰許太岳之後唐虞之際四岳之功最大堯在位既久共工驩兜伯鯀朋黨蒙蔽洪水大害堯寔憂切故遜位四岳岳不受與廷臣同辭薦舜舜既爲百揆領衆職孜孜求才得羣聖賢若非四岳薦舜禍亂未可知也

伏生書傳曰禮致仕之臣教於州里大夫爲父師士爲少師朝夕坐於門塾而教出入之子弟

咨汝二十有二人蔡註是漢孔氏以四岳爲四人不數稷契臯陶仍舊職者而并禹益垂伯夷夔

龍十二牧爲二十二二人鄭康成又不數四岳及稷契臯陶而以及斨伯與朱虎熊羆爲四人并禹益垂伯夷夔龍十二牧當之皆非觀堯典兩書岳曰是岳爲一人舜賓于四門是四岳之職及斨伯與朱虎熊羆是七人并九官乃十六人所謂八元八凱也左傳元愷中有伯虎伯熊又有庭堅即臯陶字

有虞取人以九德夏因之周以六德六行六藝惟商取人之途最廣孟子獨稱湯立賢無方然尤重世臣舊族之選以故商之君德最盛治道最

碣石有二一在廣東南海口一在冀州北海口北
碣石在海中如河中砥柱當河入海之衝鎖中
國水口真天造也河旁地淪於海碣石遂去岸
五百里其地今爲遼東西南小海其西即冀河
入海故道山海關至冀州豐潤一帶是也未有
小海時遼東亦不屬交者蓋須入山海關從永
平薊州方至交遠矣若屬青州片帆可達故唐
虞時遼東今遼陽屬青遼西今廣寧屬冀自九
河淪海而交地甚狹

傳三江者以婁松東江當之恐非夫謂之江必源
泉所注積爲巨川衍爲長流者今吳地三江直
畝澮之大者豈足爲江三江與九江九河意同
蘇說謂岷山之江爲中江嶓冢之江爲北江豫
章之江爲南江即導水所謂東爲北江東爲中
江者既有中北二江則豫章之江爲南江矣蔡
氏力辯其非豈知江流變遷安得據今之江流
而非古書也况江漢合流同滙於彭蠡旣滙而
東合而復分至海口而復合入海猶同爲逆河
入海也若以蘇說爲非今之江流則今之江流

亦非書之北江中江矣安得遽以書之中江北江爲誤而以今之江流爲足據耶舊志西楚霸王廟在和州江中去岸五里今廟在陸地去江五里註疏言三江入震澤又引韋昭說錢塘江亦在三江中謬甚

韓苑洛先生言雍梁二州黑水是兩黑水不相通魏莊渠先生言本一黑水爲雍梁二州之界觀導黑水至於三危入於南海一黑水爲是

雍州貢織皮之崑崙非河源也河源崑崙去中國不知幾萬里佛經謂之胥靡山

古史官見於經者書有史逸及太史司寇蘇公蘇公即太史故稱公非呼太史而使書蘇公之事蓋是時蘇公以太史領司寇其他史見者史過史墨史克之類亦多漢儒言容成造曆大撓作甲子皆黃帝史官

敷淺原在德安者甚卑小且於江流無甚關係法不得書地志所載在豫章者爲是即今長江鄱陽之交廬阜山是也此山最高大又當南江北匯水口猶導嶓於漢入江據書至於大別也漢註亦言在豫章

四瀆以其獨入於海故名瀆漢水以入江而入海
不得名瀆故海受百川在中國只四水爲大河
入海在兗州淮在徐州江在揚州濟在青州今
惟江淮入海之處與禹貢同河南徙而奪淮入
海濟因會通河借水通漕而其流竟莫可考
弱黑河沅淮渭洛皆先言導後言水江漢先言山
後言導恐江漢二條當在導洛之下亦自西北
而東南

江源發梁州高峻處出峽稍平禹疏其上源爲三
十六江所謂東別爲沱也河流注兗州卑處入
海甚湧禹疏其下流爲九河所謂播爲九河也
九江非禹所分原有九水注於洞庭今九江府
非禹貢九江

禮有救日之法於時瞽人樂官進鼓而擊之嗇夫
馳騁而取幣以禮天神庶人奔走供救日食之
百役周禮庭氏云救日之弓矢後庶人供之鄭
註庭氏云以救日爲太陽之弓救月爲太陰之
弓救日以枉矢救月以恒矢其鼓盖用祭天之
雷鼓也左傳有日食伐鼓用幣之禮車馬曰馳
步趨曰走

政典七政之典籍也故言先時後時與周禮政典不同

惟元祀十有二月伊尹祠於先王奉嗣王祇見厥祖惟三祀十有二月朔伊尹以冕服奉嗣王歸於亳此建丑月也可見商改正朔不改月數漢註以前爲不踰年改元後爲服闋非也

帝嚳元妃姜嫄生子遲三妃常儀慶都簡狄皆先有子帝卜四妃之子摯堯契稷皆有天下摯堯身有天下故不傳契稷久之子孫有天下故歷世永

殷商並稱北朝代魏亦然商頌云商邑翼翼捷彼殷武單稱也大雅云殷商之旅咨汝殷商兼稱也亳是殷故殷社謂之亳社

太誓十有三年蔡註以爲武王即位之十三年漢儒以爲通言文王九年大統未集并居喪之年中間武王即位不改元故云十三年皆非是今太誓與僞太誓皆可疑詳玩今太誓亦不似武王太公周公召公文法詞意比之牧誓相去遠甚豈可即據以爲當時信書大戴禮云文王十五而生武王武王少文王十四歲文王世子云

文王九十七而終武王九十三而終文王崩時
武王已八十三矣至九十三而崩適滿十年與
太誓不合今考武王已巳踐位巳卯伐商乙酉
崩蓋十有一年而東征或傳寫誤爲十有三年
據此文王崩時武王年巳七十七武王少文王
十九歲

武成告於皇天后土孔氏以后土爲地太誓類於
上帝宜於冢土又以后土爲社小劉云后土與
皇天相對以后土爲地然左傳又云勾龍爲后
土豈勾龍爲地乎地名后土社名后土名同而
義異洪武中合祀天地地神位書后土皇地祇
嘉靖中分祀北郊改書皇地祇大劉焯小劉炫
也

召誥二月旣望漢傳以爲周公攝政七年之二月
唐正義遂以洛誥誕保文武受命惟七年爲據
非是洛誥七年乃洛邑旣成成王留周公治洛
七年而卒也作不知是何年皇極經世以爲在
成王即位之六年年庚寅

丁巳用牲于郊牛二可見同日祭天地此非常祭
初立郊故祭漢說牛二天一后稷一非是豈作

洛大事止祭天而遺地乎下社是社稷之社非地也漢說社稷共太牢郊特牲曰社稷太牢今社稷異牢

武王定鼎郊廓欲遷而未遑召公先卜黎水上以夏殷皆在河北故也卜而不吉乃卜河南澗灋之間爲王城吉又卜灋水東爲下都以遷殷民亦吉二地皆在河之南洛之北今河南府是也厥後平王遷是王城敬王遷是下都春秋昭公三十二年城成周乃下都也顧氏云先卜河北黎水者以近紂都爲其民懷土重遷故先卜近以悅民

漢儒以命公後惟告周公其後王命周公後爲封禽父於魯爲周公後非是詳玩經文君臣之詞是周公留後於洛成王即辟於鎬漢儒又以王在新邑爲成王居洛亦非王在猶行在蓋是年周公繼召公至洛必以王命祭告郊社如今遣官攝祭之禮惟宗廟未祭待成王躬親之亦以留公告不可遣公祭也故於篇終又叙戊辰烝祭祭雖冬禮之常告文專爲留公治洛逸祝冊是祭廟祝文作冊逸誥是命公留洛誥命皆史

逸作

成王乙酉即位時年十三周公攝政明年三叔祿父淮夷奄人叛戊子始平之庚寅營洛周公反政於成王而留治洛邑丙申周公卒蓋攝政者六年留洛者七年

周公叙商六臣言高宗時有其盤而不言說何也正義云高宗未立之前已有其盤免喪不言乃求傳說漢儒以爲即位初有其盤佐之其盤卒後有傳說說有大功周公數六臣不言說未知其故蓋此六臣皆商前王舊臣輔後王者說乃高宗所求非其父小乙所遺之臣也周公留召公專述舊臣故數盤而不及說

康成以三亳阪尹共爲一事云湯舊都之民服文王者分爲三邑其長居險故言阪尹蓋東成臯南轅轅西降谷也皇甫士安以蒙爲北亳穀熟爲南亳偃師爲西亳蔡註立政用士安說註盤庚又用康成說二書亳同康成說是

漢孔氏註九黎之君號蚩尤史記蚩尤在炎帝之末楚語九黎在少昊之末孔註又言蚩尤爲黃帝所滅與史記同孔見楚語而爲此說蓋以蚩

尤是九黎之君黃帝雖滅之種類尚在故至少
昊末復作亂康成曰九黎學蚩尤蚩尤霸天下
者孔氏三朝記曰蚩尤庶人之貪者應劭云蚩
尤古天子諸說不同今考黃帝滅蚩尤於涿鹿
之野在北鄙南蠻多黎種九黎三苗皆南蠻蚩
尤九黎非一種也楚語云三苗復九黎之惡苗
與黎同種康成亦云三苗即九黎之後顓頊誅
九黎其子孫為三國高辛衰復為亂堯又誅之
舜攝位又竄之禹攝位又征之

詩說

轅申毛韓四家言詩為漢儒宗今韓詩外傳大抵
斷章取義語涉恢諧豈足名家必更有詩傳此
特其外傳轅申說無傳

邶風柏舟詩序言仁而不遇衛頃公時仁人不遇
小人在側故云夫子曰於柏舟見匹夫執志之
不易是也釋詩者以為婦人不得於夫之詞至
以羣小為眾妾恐未然蓋此詩語意似婦言亦
猶後世忠臣端士不得於君而為去婦歎出婦
詞妾薄命耳

擊鼓閔衛亂也內有土木後外有版築之後南有戰陣之後國小後煩民不堪命

淫奔之什多男女泛然相值相戲之詞惟衛風外內亂禽獸行宣公上蒸夷姜下通宣姜如雄雉苦匏所刺公子頑又蒸君母宣姜鶉鵲不如矣所以竟滅於狄觀此則知關雎爲王化之基不誣稠第之間隱微之際世之治亂國之興亡家之昌替身之壽夭存焉慎哉慎哉

式微中露泥中註疏以爲衛二邑恐上言中露下言泥中猶云側身天地耳

詩無燕風有召南無宋風有商頌魯亦然周南周未有天下時詩也故不曰雅而曰南

木瓜詩序美齊桓公也衛有狄難出處於漕桓救而封之遺之車馬器服衛人思欲厚報之而作是詩朱傳疑以爲相贈答之詞又漢儒相傳以木瓜爲楸木實如小瓜可食恐未然木瓜李桃一也今人有以木爲果者酒榼中嘗用之蓋無用之物此詩言人以無用之物問我尚思厚報之况齊有大造於我乎木瓜猶言土飯也

詩揚之水戍申也申平王母家周語曰申呂雖衰

徐許猶在此四國皆姜姓四岳後也言甫許者以其同姓重章變文因借甫許以言申其實不戍甫許也申被楚害故戍之朱曰并戍甫許王風丘中有麻序曰思賢也莊王不明賢人放逐國人思之作是詩留大夫氏子嗟字也由子嗟教民農業故去而人思之施施難進而易退子嗟在朝則能助教行政隱遁則能使撓埴生物公羊傳有祭仲往省於留之文毛云子國子嗟之父箋云言子國著其世賢也疏云毛時書籍猶多或有所據未詳毛氏何以知之朱傳直以爲婦人淫思之詩更詳之或曰思賢何以曰彼不曰彼美人兮乎

楚茨信南山甫田三詩皆言公卿力田脩祀然祀禮儀節因之有可考者直祭祀於主索祭祀於祊正祭於堂繹祭於祊繹祭之祊在廟門外正祭之祊在廟門內饗饗煮肉廩饗炊米廩饗又名饗饗東西爲交邪行爲錯內羞房中之羞作肉羞者非是宰夫內羞司士庶羞內羞米在右陰也庶羞肉在左陽也諸宰徹諸饌君婦徹籩豆燕於寢祭於廟燕祭不同樂而云皆入者歌

詠雖異樂器則同

詩傳曰古者田獵獲禽面傷不獻踐毛不獻不成禽不獻擇取三等自左膘而射之達於右膈爲上殺以爲乾豆奉宗廟達右耳本者次之以供賓客射左髀達於右髀爲下殺以充君庖貫心疾死肉最潔美爲上遠心死稍遲次之中協死最遲又次之三不獻面傷踐毛皆逆射嫌於殺降不成禽惡害幼少也小豨易死而難中故曰發大兕易中而難死故曰殪

賓之初筵言非射非祭不飲也射飲先飲祭飲祭飲將祭擇士先射於澤宮後射於射宮大射射於射宮將祭擇士之射也賓射射於朝諸侯來朝之射也燕射射於寢賓客相飲之射也大射皮侯賓射五采之侯燕射獸侯又有鄉射州長與民射於州序也并主皮之射爲五射祭奏樂聞之魂也而求其降求諸陽也灌地聞之魄也而求其出求諸陰也商人尚聲先樂周人尚臭先灌又曰廟祭取簫合腠管蕤之使臭達墻屋亦以求神於陽也

瓠葉序言大夫刺幽王也上棄禮而不能行雖有

牲牢饗餼不肯用也故思古之人不以微薄而
廢禮焉牛羊豕爲牲繫養者曰牢熟曰饗腥曰
餼生曰牽

笙詩有辭有聲或曰有聲無辭非也燕禮升歌鹿
鳴下管新宮新宮今亡矣宋公享叔孫昭子賦
新宮將謂管詩亦有聲無詞耶其謂斯于爲新
宮者亦非也笙詩之亡猶管詩之亡也書曰琴
瑟以詠笙鏞以間詩曰我有嘉賓鼓瑟吹笙皆
有詩也歌詠之聲依之律和之自后夔以來未
之有改也是故升歌三終鹿鳴三詩也已而笙

入三終南陔三詩也已而間歌三終魚麗由庚
六詩也已而合樂三終則二南六詩衆聲偕作
矣于是工告樂正曰正歌備終皆謂之歌而可
謂之有聲無詞耶凡樂四節首節歌也比歌以
瑟也二節笙也輔笙以磬也三節歌笙相禪也
四節鄉樂也凡樂四節爲詩十八篇皆有聲有
辭鼓瑟鼓琴笙磬同音以雅以南此之謂也

惠於宗公神罔時怨恫註言先公宗廟先公也箋
云宗公大臣也晉語云文王詢八虞度闕天謀
南宮諏蔡原訪辛尹重之以周召畢榮以寧百

神而和萬民故詩云惠于宗公神罔時恫神者
聰明正直依人而行人能行善則神明欣悅

周宣王時多賢尹吉甫最優文武全材也觀伐獫
狁及崧高烝民韓奕江漢四詩可見崧高送申
伯曰吉甫作誦其詩孔碩其風肆好烝民送樊
侯仲山甫又曰吉甫作誦穆如清風若自稱者
何也當時召伯不宜出營謝樊侯不宜出城齊
吉甫詩意可見

詩註疏云王室之衰始于懿王非也周家積德耕
稼養人千年至武王爲天子年老未幾崩成王
立時內則管蔡外則奄商淮徐相繼叛雖以周
公討之尚有破斧缺斨之憂兵戢之後汲汲興
修禮樂一傳至康王尚有召公畢公毛公康叔
禽父丁公燮父數親賢大臣相與內外佐佑康
王崩而昭王立遂南征不復竟亦未聞有討罪
之師昭王崩穆王立海內益多事徐子稱王乃
在中原豈特荒服不至而已君子惟強於爲善
使子孫可繼耳興衰豈能預料然周室雖衰爲
天王者八百年自經史以來未有歷年如此其
遠者天道固不誣也

魯頌僖公之盛然魯衰亦自僖始三桓專兵執政
皆在僖時元年公子友敗莒爲季孫氏四年公
孫茲侵陳爲叔孫氏十五年公孫敖救徐爲孟
孫氏

魯頌多僖公時詩雖能振復先緒然立三桓致專
魯政一傳而有子赤之禍祿去公室矣

魏莊渠先生言魯始封乃伯禽非周公也不知此
何所據蓋據魯頌王曰叔父建爾元子俾侯於
魯故云此直述魯之有侯自伯禽始耳周公以
親以功封魯侯留王朝不曾至魯故禽父嗣侯

於魯豈有武王大封功臣兄弟之國十四人康
侯少弟尚已封衛周公四弟又開國元勲乃不
封直至成王乃封乎王曰叔父是成王稱周公
也必武王時伯禽尚少留侍世子至世子即位
後而遣之之國伯禽決非始封之君魯得用天
子禮樂亦不經見不足信趙伯循說亦不知何
所據魯頌四篇皆史克所作駟序曰頌僖公也
僖公能遵伯禽之法儉以足用寬以愛民務農
重穀牧於坰野魯人遵之於是季孫行父請命
於周而史克作是頌魯之僭天子禮樂大抵自

此時始也

春秋外傳曰金奏肆夏樊遏渠天子以賞元侯呂
叔玉乃以周頌時邁執競思文當之非也頌以
歌於宗廟豈可用之饗元侯朱子以執競爲昭
王後詩又曰此即周公制禮九夏之三二說相
舛必記者之誤樊遏渠蓋逸詩也韋昭以肆夏
即樊韶夏即遏納夏即渠叔玉又以樊遏爲一
詩未知孰是

爾雅蓋詩訓詁也蓋子夏傳詩者也子夏輩六十
人纂先師微言爲論語論語中言詩者多矣子
夏獨能問逸詩遂悟務本之學晦翁讀詩綱領
述論詩十條而終之子夏得無意乎傳記中言
子夏嘗傳詩今所存者詩大小序小序又非盡
出子夏故曰爾雅即子夏之詩傳也疏言釋詁
周公所作今其中一字二字者姑弗論謔浪笑
傲變風詩焉得周公釋乎支干九州五方四極
佛佛徨徨之類詩無其文者或叔孫通所益梁
文所補要之傳詩者十九且爾雅有釋詁釋訓
毛公亦以其傳詩也故其解詩錯取爾雅之名
題曰詁訓傳則爾雅之傳詩毛公固謂其然矣

詩有風雅頌而獨云爾雅者雅有二小雅兼乎
風大雅兼乎頌何以故詩之詞有體比之樂有
音大雅之體與音頌類也小雅之體與音風類
也故曰爾雅兼風頌矣爾之言近也易也言其
近且易可以明雅也古之解經者訓其字不解
其意使人深思而自得之漢儒尚然至於後世
解者益明讀者益略粗心浮氣不務沉思譬之
遇人於塗見其肥瘠短長而不知其心術行業
也又曰陸農師以說詩有名多識鳥獸草木虫
魚註爾雅又著埤雅

春秋說

聖人將修春秋使子夏等十四人求周史記得百
二十國寶書又與左丘明乘如周觀於周史乃
作春秋既成以授游夏令參正之對曰不能贊
一詞已乃稽之卜得陽豫之卦此漢儒之言其
去聖人未遠宜信

杜氏謂獲麟而作春秋范氏言作春秋而麟至杜
說是司馬公言春秋文成數萬張晏數之纔得
萬八千字李氏數之更闕一千四百二十八字
公穀書孔子生左書仲尼卒皆非春秋本文

古者釋經不敢自信故其傳不與經相參雖孔子傳易亦然春秋三傳亦不聯經石經書公羊傳有傳無經漢諸大儒為傳訓者往往與經別行至季長註周禮謂如此則學者兩讀遂以傳入經後漢以來就經為傳者自季長始也元凱解左傳亦合而為一

諸侯五廟惟魯六廟文十三年公羊傳曰周公稱太廟魯公稱世室羣公稱宮穀梁曰太室即世室

穀梁傳曰誥誓不及五帝盟詛不及三王交質不及二伯然虞征苗禹誓師五帝已有誓周禮司盟之官三王亦有盟左傳云平王與鄭交質是桓文前亦有質穀梁傳出漢初未見諸經耳

猗嗟齊人傷魯莊公有威儀技藝然不能以禮防閑其母失子道致人以為齊侯之子左氏亦云桓公曰同非我子齊侯之子然文姜桓公三年歸魯至六年九月生子同中間未嘗會襄公故春秋書子同生詩亦言展我甥

史記曲沃桓叔之孫武公滅晉盡以其寶器賂周釐王王以武公為晉君列於諸侯無衣之詩蓋

述其請命之意左傳魯莊公十六年僖王使統
公命曲沃伯爲晉侯此大事春秋不書不赴告
也僖即釐

公羊傳云天子庶人皆親逆左傳謂王尊不逆后
魯哀公曰冕而親逆不已重乎子曰合二姓之
好以繼先聖之後以爲天地宗廟社稷之主君
何謂已重乎此天子親逆之說也

禮說

士冠禮天子諸侯大夫同天下無生而貴者冠而
受命於君始貴也若天子諸侯踐祚而後冠者
又有公冠禮其實以大夫之賢者

周禮太卜小事筮大事卜應筮而又用卜應卜而
又用筮及國之大事先筮後卜僖公二十五年
晉侯卜納王得版泉之兆曰吾不堪也公曰筮
之遇大有之睽哀公九年晉趙鞅卜救鄭遇水
適火又筮之遇泰之需皆先卜後筮

周禮職金曰受士之金罰貨罰入於司兵是周之

贖亦止用之官府學校鞭朴之刑五刑有流而無贖言士則民亦無贖穆王時五刑皆贖又不分士民

副車朝祭者曰貳車兵戎者曰倅車田狩者曰佐車皆謂之後車

高禘即先媒亦曰郊禘又曰人先

尸取同姓同姓之中用其適男周公祭天太公爲尸祭岱召公爲尸

索祭羣神報之曰大蜡臘祭先祖五祀令民得大飲曰息民息民大蜡二祭同月大蜡之祭素服息民之祭黃衣古者祭服尊於朝服

行也祖也釋輶也一祭而二名也祖而舍輶飲酒於其側曰餞

天子至大夫婚皆有留車反馬之禮婿車在百兩迎之中婦車在百兩將之中女有昕婚用昏請期用昕親逆用昏日入三商爲昏霜降婦功成嫁娶行水泮農業起婚禮已季秋至孟春皆可婚

記曰雩宗祭水旱也宗讀爲崇讀如字者誤矣夫雩請雨故魯旱則雩崇請霽故鄭水則崇古之

雩祭以牲雲漢詩曰靡愛斯牲是也禋祭以牲
春秋大水鼓用牲于社于門是也左氏凡大災
有幣無牲之說豈別有據乎周禮雩祭司巫禋
祭鬯人各專其事漢禮雩衣皁禋衣朱各異其
物蓋雩從雨禋從火故雩以女禋以男雩於北
禋於南陰陽之義也舞皇用瓢古法也或謂雩
以男侷禋以營域更詳之

陰厭陽厭求諸神者無定位也不知其神在此乎
在彼乎故有正祭必先之以陰厭終之以陽厭
孝之至也孝之至也者愛之至敬之至也何言

乎陰厭陽厭也陰厭于奧也陽厭于屋漏也奧
室西南隅不得戶明故曰陰厭屋漏室西北隅
當屋之白故曰陽厭此疏說也抑亦陰謂神之
歆祝而始來陽謂神之就享而將去其來來自
陰也其去去自陽也詩正儀云大夫無陽厭非
也夫特牲饋食士禮也陰厭陽厭不殺于士而
况大夫少牢饋食不有陰厭乎有司徹不有陽
厭乎少牢饋食有司徹皆大夫祭禮也一事也
有司徹者少牢饋食之終也大夫之祭始饋尸
于堂卒禮尸于室一日之事也非若天子諸侯

之祭明日而繹故少牢饋食無陽厭有司徹有
之有司徹無陰厭少牢饋食有之大夫之祭其
先也隆于士而殺于諸侯也非大夫無陽厭也
惟夫宗子殤者陰厭耳矣庶子殤與無後者陽
厭耳矣是謂殤不備祭由是觀之陰厭之禮隆
于陽厭備于陽厭徐于陽厭陽厭者徹俎而改
饌也又曰二厭無尸陰厭而後迎尸尸出而後
陽厭也

孝經說

呂氏春秋引仲虺言刑三百罪莫重於不孝孝經
曰五刑之屬三千其罪莫大於不孝殷周之刑
豈煩簡相縣至此

聖人以春秋屬子夏孝經屬曾子春秋二尺四寸
書孝經一尺二寸書詩亦屬子夏

大學說

石經大學次序亦自可玩味首大學之道四句次古之欲明德一節又次物有本末四句又次綿蠻詩又次知止節又次邦畿節又次聽訟節又次自天子二節又次物格而后知至節又次所謂誠其意章又次所謂修身章食而不知其味下有顏淵問仁子曰非禮勿視非禮勿聽非禮勿言非禮勿動二十二字次所謂齊其家章次所謂治國章首節次一家仁節次如保赤子節次故治國五節次所謂平天下首三節次秦誓

四節次節彼南山節次是故君子先慎乎德四節次殷之未喪師節次楚書節次是故言悖節次康誥惟命節次舅犯節次仁者以財二節次生財節次孟獻子二節次是故君子有大道節次堯舜帥天下節次明德親民二章次穆穆文王三節終焉

大學一篇初在戴記中程子始表章因而更定之朱子爲之章句今傳習者是也漢大司農鄭玄所註唐國子祭酒孔穎達所疏皆古本也元金華王氏栢四明黃氏震草廬吳氏澄國朝正學方氏孝孺山陰景氏星溫陵蔡氏清莆田鄭氏瑗新安潘氏潢各有說惟餘姚王氏守仁尊信古本余固不敢謂古本有錯簡也又有石經大學與古本大學不同魏政和中詔諸儒虞松等考正五經衛覬邯鄲淳鍾會等以古文小篆八分刻之於石始行禮記而大學中庸傳焉松表述賈逵之言曰孔伋窮居於宋懼先聖之學不明而帝王之道墜故作大學以經之中庸以緯之則學庸皆子思所作經緯之說亦不爲無見蓋必有所受矣戴鄭賈三家皆不分經傳經傳

分於宋儒

論語說

漢初論語三家魯人所傳曰魯論語即今所行篇次也常山都尉龔奮長信少府夏侯勝丞相韋賢及玄成魯扶卿太子太傅夏侯建前將軍蕭望之並傳之名家齊人所傳曰齊論語視魯多問王知道二篇其二十篇中章句頗多於魯昌邑中尉王吉少府朱畸瑯邪王卿御史大夫貢禹尚書令五鹿充宗膠東庸生並傳之惟吉名家古論語者魯共王壞孔宅得古文論語於壁中凡二十一篇有兩子張如淳曰分堯曰篇後

子張問爲從政篇篇次不與齊魯同博士孔安國爲傳後漢南郡太守馬融註之安昌侯張禹受魯論於夏侯建又從庸生王吉受齊論擇善而從號曰張侯論最後行爲世所貴禹以授成帝後漢包咸周氏並爲章句列於學官漢末大司農康成就魯論張包周篇章叅考齊古爲注魏司空陳羣太常王肅博士周生烈皆爲義說吏部尚書何晏集孔包咸周馬鄭陳王周生說并已意爲集解宋侍講學士邢昺爲之疏古文者科斗書也所謂倉頡本體周所用今人不識也形多頭麓尾細狀復團圓似水蟲之科斗

佾舞之數服虔說每佾八人蓋減行數不減人數隱五年左傳考仲子之宮將萬焉公問羽數於衆仲對曰天子用八諸侯六大夫四士二夫舞所以節八音而行八風故自八以下杜預云惟天子得盡物數故以八爲列諸侯則不敢用八預及何休說行減人亦減正義以舞勢宜方行列旣減即人數亦宜減從何杜說諸侯則六六三十六人也

六十四井爲甸甸方八里四邑十六井爲丘戎馬

一牛三四丘爲甸長轂一乘四馬牛十二頭甲
士三人步卒七十二人戈輶具備丘馬謂之匹
馬甸馬謂之乘馬

心無動靜動靜非心也性無善惡善惡非性也動
靜者意也善惡者情也有知覺者意也情也無
知覺者心也性也故曰無聲無臭至矣

孟子說

孟子至炎漢後始盛傳於世註有趙岐陸善經音
釋有張鎰丁公註自善經已降訓說雖小有異
同而共宗趙氏音釋二家張氏徒分章句漏落
頗多丁氏稍識指歸僞謬時有至宋孫奭等作
音義二卷以糾正二氏之說又因趙氏說爲正
義於是孟子有趙註孫疏行於世七篇各有上
下趙所分也

天子三臺靈臺觀天文時臺觀四時施化圉臺觀
鳥魚諸侯無靈臺秦伯舍晉侯於靈臺周故宅

也衛侯爲靈臺僭矣又云天子靈臺諸侯觀臺
徵招角招爲事爲民皆以招名者孫氏云舜作歌
以康庶事鼓琴歌南風以阜民財之意恐未必
然是時韶樂尚傳於齊又世皆重韶樂角木音
三分羽益一以生其數八八六十四民之象也
角亂則憂其民怨徵火音三分宮損一以生其
數六九五十四事之象也徵亂則哀其事隳宮
九九八十一商八九七十二羽五八四十八商
三分徵益一以徵五十四而三分之每分十八
於五十四而加一十八則得七十二矣羽三分
商損一以商七十二而三分之每分二十四於
七十二而損二十四則得四十八徵角放此
孔門諸弟所問皆性命道德之旨孟子弟子所問
不過古今聞見人情世變而已惟公孫丑問不
動心最精切

經傳說

古者釋經不敢自信故其傳不與經相參雖孔子傳易亦然春秋三傳亦不聯經石經書公羊傳有傳無經漢諸大儒爲傳訓者往往與經別行至季長註周禮謂如此則學者兩讀遂以傳入經後漢以來就經爲傳者自季長始也介甫非春秋永叔毀繫辭傳君實詆孟子兩程子改古大學晦翁不用子夏詩序何也

端簡鄭公文集卷二

海鹽鄭曉著

子履浮輯

歌行

大同行

嘉靖乙酉

太平天子臨端黼
 桑土綢繆莫予侮
 極知樽俎有餘威
 良恐因循破寧宇
 憶昔高皇蕩滌初
 大同咫尺巢胡虜
 長陵建國燕山隈
 甲冑躬擐肯些窳
 六龍一日度金川
 烽煙塞上紛如羽
 提兵百萬過清淮
 飛輓尚書鑿齊魯
 抑自前茅望斗南
 上谷雲中皆樂土
 上下安恬四十秋
 土木倉皇驚失伍
 大

將生歸知不知鐵騎長驅薄宣武此時非有節菴
翁山前山後無完堵邇來幸值胡運衰却諱門庭
豢豺虎河西都督悍且驕節使淋漓葬旗鼓寧武
關頭復嘯號豸史奔波向宣府囂聲相扇動三陟
萌芽護養幾如股舊邊之役竟奈何五堡健兒譁
無主大同城外殺參軍大同城內割都撫親王草
草東南行回首宮中但塵部司徒捷報自爲功翻
然破膽陽和塢將軍忠勇世所希誰謂功成茶更
苦白旄無計效丹心蒼頭有血流朱戶一呼再亂
不可收從而叛者十之五債帥出匣遂邀求虎印
魚符輕販賈喜峰元帥舊金吾韜畧胸中不妄詡
自言境內近耕桑漁陽士馬三干部跳盪居庸百
里間慎勿朝堂崇煦嫗朝行暮止徃復還東泉侍
郎嗟無補識面言官不肯言鉛山相國嗔相迂會
昌任李澤潞平裴佐元和削淮浦君德盛矣臣道
衰郎曹抗疏還思補

黃山行

君不見黃山兀兀都靈竒千峰萬峰相嶽巖地維
中盤岱華坼天苞上拔斗牛欹大者龍躍細者馬
馳起者騫鳳伏者蹲獅湖江面負僅潢潦日月東

西相蔽虧偃蹇瓊瑰粲磊落覲髮草木敷英莖赤
鼎仙人間玄扃白芒隱士弄蒼芝浙中使君黃山
產山中三復崧高詩君佳黃山山不輕君出黃山
山有名明光對罷羣公驚伐木深交徧兩京虬髯
蕭爽揮塵纓水肝瘖踏憂天傾旬方賦政孚官程
時時海上擁雙鉦結旌雷解三春雨攬轡晴飛六
月翼我思君今胡晦胡明願君素履利堅貞勲庸
鏤入昆吾銘我牧我耕我饁我觥我歌我曲吹我
笙山海遙遙無限情

映山行

我聞成山高斗入大海中下有蛟龍窟上有蘭桂
叢西蟠齊魯連岱岳東走海底千里萬里蜿蜒接
方蓬白鹿朱鴈紛竒產石橋煙洞秦標漢島處處
尚有神仙宮海澗山高形勝截膠東久矣生才雄
劉子結廬成山側映山映山相籠從伯氏英山真
將種映山難弟何冲融束髮讀書鄙紈袴牧人更
有循良風怪見貪殘欲唾面海民阨如此瘰恫嗟
乎嗟乎大官小官皆齷齪官評那復論汚隆堅堅
劉子須自愛青天白日曾曹曹我歌映山佐劉子
映山從此益崇崇

凱賁行

先生矯矯人中龍翹翹經濟無留踪河東報政幾
朝夕蒼珩赤芾疇竒庸五命藩叅守嵩洛鴈門制
府遲檐裕談笑風霆賊破膽羨公師律更軍容有
時中堅坐虎帳有時左次披羊縫有時三捷破深
窟有時一戰獲高墉司馬論功真中率受藏之饗
何重重南金匪頒出天府雙雙綺繡輝雲彤馳驅
汴浙賦靡盬上答恩思展靖共邇來山後羽書棘
輶車况復征南賓安得雄才盡如此萬方安堵樂
春農

送平齋先生長告還鄉

曾聞洪武詔開科經行名實相參磨已乃一切徵
文字英賢緣此竟蹉跎平齋文章本竒絕千言頃
刻如懸河小比輒利大比北命也蹇產君奈何玉
潤金鏗衆所羨周鼎商彝世豈多我欲薦君愧無
力公然竊位真媿嬰秋風發發吹塵土霜月如如
滿薜蘿丈夫處世誰窮達爲賦高車秣馬歌

五言古詩

坦齋

轟轟呂梁水齒齒呂梁石水上豚魚飛石下鼃鼃
躑躅洄復遡流俱是險中後念我坦齋翁翛然自
清懌授衣屋後桑酌酒溪中鯽燕雀欣往來牛羊
滿場屋抱膝嘻兒孫野老班荆席冥心到羲皇信
手交棊弈但願年穀登吾生與之適愧我走風塵
畏人時踟躕何不歸去來百年幾朝夕迷途未遠
而毋爾徒歎息

題羅大叅卷

多病久習懶結門謝賓客羅子良不訾惠然坐幽
僻躊躇接話言歷歷道先澤弘文密勿姿司空才
鴻碩纓綬百年餘桃林長風格慶源固遙遙產此
崑崙壁白茅薦明堂雕琢輕萬鎰東登會稽巔南
摧搖鬼魄翻然賦歸來乾坤肯躅躅請披文江圖
中有改齋筆改齋不可作遺此比金石珍重文江
翁脩名共無斁

寄費生

憶昔洪武中我宗遘奇變爾我甥舅家保育危如
線邇來百餘年骨肉相依戀世世結婚姻恩義金
可斷吾母爾祖姑憐爾中衰散爾來寓吾廬孤立
持楨榦我茲宦中朝留爾守阡陌別後今幾年規
言聽擘畫養蠶復養魚種田須種麥墻籬布桃梅
墳墓脩松柏歲時瞻宗親饑荒賑佃客升斗必齊
同等允無折閱稅糧依程期衣食甘粗劣足跡避
官衙口言戒欺啜莫謂天可瞞蒼蒼僅咫尺莫謂
衆不知神明在堂宅積善慶源長結冤路頭窄但
憑強暴侵天理有順逆但憑讒謗加人心有黑白
保護我田園兩家綿世澤爾不解文詞俗語我迅
筆事事皆平常句句皆老實違此受煩惱信此逢

立齋真文集 卷二
六
自
康吉丁寧復丁寧我有歸來日

五言排律

壽少保許太宰

天佑孚平格高崧鬱降神三川開混沌雙岳擁嶙峋
雄秀原非偶精英自有真發祥靈寶域懸貺壽星
辰華牒聯姜呂名家沓鳳麟祝鳩曾詗母乘傳竟
歸輪宇內傾心久朝廷虛席頻勲庸傳鼎鉉銓揆
並陶鈞題目山公啓歌遊召伯陳才憐墉上隼廢
起轍中鱗破格先行鴈循資後積薪激昂揮劔履
調劑適甘辛對客無慙色憂時莫轉輦荀龍仍濟美
揚鱣更同倫展也箕裘地依然桃李春謙光

騰讓表端慎注溫綸清議推完節蒼生總要津商
宗援老遜姬服重耆純几杖孤卿備眉鮫戩穀臻
乾坤茲寵錫河漢正流銀玉露團秋爽金疇獻歲
新砂丹凝碧海氣紫抱青璘斗北橫台象躔南候
老人赤鯤增羽翰玄鶴迴風塵孝友登周燕威儀
浹衛賓素絲占退食黃髮會猷詢方叔經營壯寬
夫器度淳萬年欣拜虎四國願留申膏澤霑行葦
帡幪倚大椿九重咨袞職未許憶鱸蓴

中麓草堂

胡峰元峻絕中麓更孤騫却擁盤龍窟遙臨踞虎
巔斗焉東入海截彼上摩天拔槩留今古長城跨
幅幘雞鳴日在掌瓜漏水如纏搖落於陵室徘徊
甯戚田山河齊十二禮樂魯三千蘭蕙茲成畝松
杉不計年時平饒稼穡世亂脫戈鋌值此精靈地
寧無秀發賢文章韓吏部翰墨柳公權業本淄南
授名由櫪下傳麗詞五色錦彩筆八花磚信手高
襟賦論心種葛篇讀書仍破卷雄辯復驚筵意氣
風雲動銓裁藻鏡懸象鞮通禹甸離杞論周編下
榻皆徐穉談經失鄭玄壯圖存鼎鼐結志寄林泉
白飯晨初熟青藜夜獨燃蚤期呈豹隱小築旁牛

眠壹了蒼生念還隨綠野緣

周玉山壽母

遊子離南國羈懷遶北堂垂絲人未老鼓缶日初
長渴飲青城水饑餐白海桑百年應過算三壽合
無疆擬作閑居賦遙傳燕喜章城隈看去馬驛路
問歸航夜漏銀河淡秋風鴈浦涼衣冠新雨露宅
里舊松篁賓客當歌舞兒童送酒漿墳麓均大雅
蘭桂襲餘芳紫拍前溪蟹黃收後圃梁六禽供綺
饌九醞溢霞觴天際窺笙鶴雲端落鳳凰大椿滋
美蔭列宿注精光毛義須臣漢王維本仕唐潘輿
頻往返蕭雉任翱翔吳越千山共江湖一水將羨
君能錫類愧我尚遐方

述懷

天運何駸駸人生徒碌碌依違恒自疑毀譽仍相
續摠角驚血駒特弁貺萃鹿性情渺聖途聞見狃
鄉塾消渴岐陽歌餘波汲冢竹偶然抗青霄從此
謝白屋富貴非夙心芄蘭有初服幽懷董園帷竒
策賈廷哭翰苑愧絲綸兵曹傳弓鞬龍驤亦舉麾
虎帳曾推轂罷戰隔雲中囂聲連上谷小臣守坤
裳上相憂鼎餼密雪變燕然悲風動平陸宗祊援

本支朝會諮昭穆聚訟庭易盈多謀室難築百官
混拘孿九死紛紛匍匐清晝詫飛鴉旅亭對鳴鵬雅
言茶更飴易象腊且毒猶藉父兄恩尚縻升斗祿
雷霆幾震疊蒲柳競消縮新殿榜黃金司空貸神
木恭皇漢沉綿濮議宋反覆今古同綱常晨昏異
寒燠公卿韓稚圭館閣歐陽叔七廟叨餘靈兩宮
故交睦翠華候寢興榆翟羞種桂載鬼破羣蒙包
桑效率復嗟余遘閔凶壯歲棄慈育涕淚迸重泉
躊躇走聯麓三冬足嚴霜千里怯良僕蹴險瀛漢
冰褰裳恒衛澳周秦蒼蘚碑鄒魯紅塵輓達巷射
御荒嶧陽梧桐熟彭城凜波濤沛井愁湯沐沙畧
濟河流潮奔淮海汎一磯漂母臺萬樹嵒家族瓜
埠帆檣遲焦山蛟螭逐扣舷起羣鷗解纜落孤鶩
京口多遊觀吳關鮮淳朴蒹葭壯秋深菱芡墮庚
伏澤國况蕭條江雲寧慘黯寥寥敬輿祠黯黯聞
琴輿憔悴登几筵呼號摧杼軸取譏陳情歎負篇
遠遊牘匝月敢易衰倚廬能啜粥賻乏堯夫舟兆
有君平卜水土鍾英華子孫庇清淑閉門詠停雲
抱膝占大畜勲業固恂恂言詞竟鞅鞅駕駑待着
鞭飲鼠期克腹攻玉西南朋希賢四八日膏梁就

端簡真公文集 卷二
糠粃布帛經錦縠影響羊問岐支離珠買積詩書
豈絕倫冠屨皆邊幅弱貌失留侯虛談得馬謖魚
鰕但茸肥壟畝未幽獨采筆任雕章素餐知伐輻
單衣念唐虞駟馬危綺角清濁付滄浪災祥匪尸
祝哀蟬落日喧好鳥深樹宿荆席欣嘉辰椿堂保
遐福應知益乃謙奚羨拙者速名驥方遙遙微坦
尤肅肅

五言律詩

答胡九峰鴻臚 二首

三復閑居賦慙余種葛篇大明懸藻鏡後進足韋
弦賈傳仍條策揚雄莫草玄江湖憂不細何處可
高眠

二

文選今方重鴻臚漢不輕一言能取相三考尚爲
卿江濶秋風冷天高玉露清相看各努力頭白見
平生

詠馬

伯樂空羣去王良附路還秋風蒲海外春草躍龍
間將相皆天駟驂騑已帝閑神靈真有種十駕詎
能班

大風

半載燕山客憂時不憚煩飛塵穿几閣宿麥盡兵
原春色隨風減蛙聲候雨喧 聖躬頻露禱橫吏

莫推門

即事 四首

臨淵思結網鼓瑟貴調弦劇盜橫江海饑民半幅
隕冥鴻曾避弋市馬未歸燕 聖主今宵漢明朝

御講筵

二

天王不好武獨秉太阿鐔厚幣方賓帥前茅已桂
林北收光祿塞西謝玉門琛經濟慙余拙歸心逐
莫礎

三

廟堂今盛德災變豈無緣星隕黃霾日水飛白露
天瘡痍還下詔虜騎久窺邊憂國如公少將詩莫
浪傳

四

萬方皆願治天意豈難諶州郡貪夫急邊陲債帥
淫蝗飛江可渡蛟舞陸爲沉不憚輪臺悔何愁歲
屢侵

和容庵阻雨 二首

道誼定交期相逢慰我思斷金頻問易伐木喜聞
詩雨急雷霆鬪風高鳥雀知吾徒仗忠義放棹不
須疑

二

江湖原是險丘壑本吾情去國輕王粲爲園憶邵
平乍逢春雨暗漸覺暮雲晴一笑雙蓬鬢耕漁足

此生

途中 十二首

何處寒山寺離家有一旬風塵千里客霄漢百年
身好鳥求深樹游魚逝釣緝獨憐滄海月時照白
頭人

二

江上多青草秋風尚未頽露深偏受月虹淡故收
雷慷慨辭溫嶠歡娛戀老萊何時賦歸去莫使衆
人猜

三

大椿東海上清陰播桑田歲月周三百春秋並八
千何如招隱曲負却遠遊篇夜夜庭幃夢江雲白
滿船

四

幾日離東海今朝問惠泉春堂開奉詔孝績付遺
編抗志辭榮表終身色養年嗟余爲升斗奔走更
誰憐

五

京口江流急焦門海氣通海平雲冉冉江動月朧
朧粲仲悲江北巢翁慕海東人生各有意江海一
飛蓬

六

搗練聲何急家貧亦有親履霜知謝葛流火輒歌
幽白鴈隨江草黃花照客巾不知東海畔裘褐竟
何人

七

白面誰家子青春辭故鄉柴門徒寂寞毬馬自飛
揚黃稻三秋雨蒼葭一夜霜天涯人更老爲爾問
歸航

八

不是西川路胡爲有杜鵑夜啼千樹月子餒百巢
巔錦水春過舍天津月上船也知歸去好衰白自
周旋

九

發船休打鼓而使夢魂驚寤語歌綿葛傷心雜杜
蘅艱難迷後甲容易愧先庚行後嗟予子能忘陟
岵情

十

北海秋濤壯吾鄉亦此時七年頻往返一日幾盈
虧畫舫餘簫鼓漁人但竹枝雲深千里外誰補白

華詩

十一

此境非吾土逢人面自生長風雲黯黯落日鬢薨
薨地軸連鯨海天街接鳳城南枝三匝鳥故作護
兒聲

十二

盡角聲何壯清秋意獨悲孤城芳草歇兩岸白蘋
吹片月輝輝起來鴻衍衍儀無邊江海夢深夜一
淒其

中秋憶陶雙泉

選部雙泉子今秋尚戍邊百年心共苦萬里月同
圓生死憑誰問饑寒獨爾憐殘星過斷鴈愁絕塞
門煙

諸同年被謫五律

流落嗟君子生歸尚自憐原華悲驛路墉隼失秋
天南國風塵外西江繡斧前青天不敢問月夜亂
啼鵑

二

憶昔明光殿賢良莫爾過履霜曾抗疏塗豕竟傳
訛九畹多蘭蕙三秋足芰荷勲名千古事未肯歎
蹉跎

三

風雨淮山桂饑寒秋杜詩故人今五岳逐客未三
危白馬唐無國丹書宋有碑幸逢明聖日何事弔
湘纍

四

客邸驚孤鵬虛窻泣聚螢錢江春浪白海穴暮雲
青王貢名猶在雷陳事已零獨憐今夜月千里共
滄溟

五

莫爲浮名動，頻看大學章。
支離虛兩漢，詞賦陋三唐。
鹿洞規模遠，鷺湖感慨長。
聖途須自擇，何處覓空桑。

懷子鎮

春日虛鴻鴈，薰風理素書。
極知歌杖杜，未肯歎衣
柳雲物朝朝變，江湖處處賒。
何當問舟楫，共款子方廬。

懷友人三律

三益真吾友，棲遲獨爾憐。
風流千里外，談笑十年
前。客子登樓賦，佳人種葛篇。
何爲長太息，春草故

芊芊

二

芊芊春草夢，常在故人邊。
荷館論文日，薇堂勸駕
年。高梧宜鳳起，幽谷帶鶯遷。
尊酒何時共，溪深萬
樹煙。

三

煙樹深溪裏，虛窻竟日眠。
雲歸星在戶，月動海如
天。攻玉知吾短，滋蘭愧爾賢。
乾坤未牢落，早晚向
龍田。

北山

古館集卷二
磊落北山子蕭然水石心春葩來曲戶夏日散踈
林采杞青雲路移文白首吟江湖詞賦客千里有
知音

半村

之子幽棲日西亭吏隱時卜鄰過舊墅樽酒共新
醜春草雲塘路秋風震澤陂未須城市遠回首謝
塵緇

園居 五首

有屋聊成堵扶踈竹樹林門低通鳥雀臺迴異晴
陰急電流深莽驚雷度遠岑白頭斯道在猛省得

吾心

二

吾生已如此抱病對朝暉梅老花偏密桑柔葉正
肥隔林聽鳥喚傍水看魚飛幽意那不愜何妨心
事違

三

晨起懶梳頭此身幸無恙千峰雷雨過一夜松枝
長飛鳥入林低遊魚遡水上兒童莫應門客來好
標榜

四

風雨胡能久晴明諒有時稻花承早露草色附遊
絲天地本叵測兒童莫浪疑人生半休戚達者自
宜知

五

乾坤今變化日月已居諸海內誰知已山中此舊
廬光榮卑二鳥憔悴憶三閭謝却周公夢冥心混
沌初

黃司訓還莆

羨君歸故里我亦戀耕桑海上風雲晚山中草木
長乾坤容俯仰毀譽任低昂此意誰能識離筵更

一觴

憶黃海野

齊人重知己管鮑幾千年庶見渠陽子應憐種葛
篇談兵雄有籌掄士氣無前密慎攻吾短頻書到
海邊

金山寺

獨上金山寺江光照眼明孤根通灩澦倒影落蓬
瀛危石層層起流波面面平屹然常砥柱潮汐任
虧盈

彭城

彭城天下險萬里接河源落石東南斷飛濤日夜
喧江淮連絕島齊魯入平原寄語當關者征求無
太繁

宿浦口玉靈觀憶石城

日月開江表干城殿北涯過山莊子宅隔岸許由
家經濟非吾事塗泥莫自嗟道人鐘磬發爲爾說
南華

故人

莫寄故人書遐心竟我踈斷金原有約按劍欲何
如海上田園在江干歲月虛應須返初服努力事

春畬

答陸篋齋

福星開軫翼江漢度旄麾擊楫心猶壯登樓賦亦
竒金蘭吾有分鐘鼎爾爲期此去頻行縣春農正
及時

即事

九廟神如在千官疏不違爾曹無偃蹇吾黨有光
輝北極懸黃道前星傍紫微翻然開象魏歡喜動
龍旂

雪屏

叅差雙嶺合混沌九溪分山色侵城見泉聲隔座
聞龍關兼鳥道素雪帶朱霞南國饒蒸鬱清高自
不羣

七言律詩

居和陽和宋賢三老堂

龍蛇到處可存身况復 君王本聖仁華省廿年
從自負名州六品未全貧誰言白璧完非偶自信
黃金煉更真補袞扶天三老在好將心事對前人
和謝右溪僉憲致仕 二首

曾聞聲望十年餘喜見輝光滿玉除愧我未投鳴
鳥句憐君已上逆鱗書關心宗社誰休戚轉眼煙
雲任卷舒 聖主只今勞夢卜可能從此老耕畬

旌旄何事忽西還
吾道行藏信有天
好遜已知君子吉
知幾更有丈夫賢
相逢且誦閑居賦
此別應傳種葛篇
東海西川千萬里
清風明月共悠然

秋日海上 八首

閒來海上問中林
萬里秋濤爽氣森
尚有天津通宇宙
翻然地軸變晴陰
鶉居悵望頻回首
雲物蕭條獨此心
落日平沙莎滿路
紛紛月色又霜砧

二

憲使祠堂棟宇斜
獨留俎豆見年華
祇愁白屋纖纖稼
猶喜青天練練槎
寂寞蛟龍迴夜雨
蒼茫燈火落秋笳
溝防一瀉雙隄壞
不見菱荷到處花

三

層樓千尺對晴暉
何事行藏意轉微
天際冥鴻寒氣歛
雲間浴鷺浪花飛
長公去國心猶壯
長孺還朝事已違
白髮于今須杖屨
年年海味亦甘肥

四

孤城海角若星棊
聞說三遷事更悲
百谷東南虧地力
九秋潮汐任天時
黃灣水落魚蝦亂
白塔煙深草木遲
鼙鼓年年聲未息
何人肉食抱長思

五

端齋文集 卷二
雲車何日到三山却笑秦皇想象間祠宇蕭蕭傍
東海輻輳草草度西關丹成七日虛金鼎花落千
秋累玉顏萬水一漚真幻化臨風莫問鬢毛斑

六

歷歷川流注海頭不知漕艤幾春秋婁松昔罷登
萊路豐沛今添汶泗愁去住未能存老馬浮沉猶
自付輕鷗明河一夜心千里天北天南共此憂

七

獨立滄溟歎禹功長隄隱見亂濤中鹽田何處蘆
花雨茅屋誰家燕子風漂泊苔痕兼水碧參差楓
葉帶霜紅珊瑚樹底垂綸者豈盡天涯白髮翁

八

六鰲三島自相迤萬壑千源共此陂塵網漫隨青
鳥翼慈航誰悟紫雲枝光流白鷺隨潮迴影落蒼
龍並月移夜夜江南看北斗微垣深處袞衣垂

留城子房廟

西風嫋嫋隔河津何處留侯廟貌真恩義五朝須
事漢英雄三戶竟亡秦赤松草草非無算黃石倦
倦信有神出處平生還自愛不妨江海一綸巾

壽張竹村封君

幽居遙望住雲間叢竹陰陰獨閉關跡入沙汀鷗
與伴身扶鳩杖鶴隨還十洲家近尋仙藥三徑花
深對暮顏南國淹留青瑣客春暉長媚舞衣斑

壽劉初泉乃翁

早辭簪紱臥雲煙白海青城在眼前閉戶不傳招
隱賦開緘曾讀養生篇欲將道藝推劉向豈有文
章似鄭玄試傍天南占象緯老人今度壽星躔

七言絕句

放舟

春風春雨放舟行兩岸春花照眼明却憶故山冰
雪後手栽松柏正青青

和陽公寓

公門雖設晝常關山色江光滿座閒有酒懶斟書
懶讀更將何事擾人間

諸將

十一二首嘉靖辛丑

胡馬南驅摧紫塞材官北面守黃河風塵不斷千
山動渾脫相牽一葦過

二
狗澗灰泉斷鼓鼙滿川胡騎下山西旌旄霧捲秋
風暗刀劍霜拋夜月淒

三
七月初旬虜報聞直從白露過秋分東西殺氣方
千里牛馬長驅幾萬羣

四
太原天險傍雲中保障今誰第一功西顧榆林東
上谷漢家京兆此扶風

五
胡兒落鴈誇鳴鏑元帥椎牛賽燾牙冀北於今驚
趙魏河西且莫問瓜沙

六
驃騎未搜青海賊匈奴還結黑山奚朱旗夜躍雙
城破白骨秋燐萬鬼啼

七
制府魚符縛錦幃將軍虎印臥征徼隔山傳箭催
朝食對面援兵怕解圍

八
邊臣累疏竟蹉跎詔問羣僚發難多陸賈未能調

北館真文集 卷二
將相武侯焉得倚山河

九

連山黃葉落胡笳滿路蒼天哭魯髻殿後屯兵逾
半月村前流血已千家

十

三關飛檄陳都憲一騎倉皇祝總兵降虜掉頭真
定路番酋笑指大同城

十一

鴈門烽火隔龍泉倒馬居庸自接連諸將提兵相
倚角幾時凱奏答皇天

十二

朱雀西纏太白消軒龍東指歲星搖即看月掩旄
頭黑定斬單于塞上梟

世傳集

